

■ COLUMNNA

Too big to fail

DAD ERWIN ARDÜSER*

Chantar fa bain a corp
ced olma! Tgi che ha
sez fatg l'experientscha, tgi
che chanta en in chor, vegn
ad admetter quai.

Etuttina: Sch'ins guarda
per exempel sin il dum-
ber da persunas activas en
in chor pudess ins tscha e là
plaunsieu cumenzar a far
quitads per l'existenza a
lunga vista da questas
instituziuns. Instituziuns
che vegnan adina puspè ta-
xadas sco impurtantisch-
mas per nossa cultura e so-
cietad. Mabain, forsa che
gist la crisa da corona ac-
tuala – cun biro a chasa,
distanza sociala e scumond
d'occurrentas – pudess dar
in impuls a nossas uniuns.
Forsa ch'il manco actual da
contacts ed inscunters pu-
dess animar ina u l'autra
persuna da tschertgar la
cumpagnia en ina uniun.



L'expressiun «too big to
fail» vegn adina puspè
duvrada il mument ch'ina
interpresa ha difficultads fi-
nanzialas, stat avant il con-
curs. «Memia impurtant
per far naufragi» n'èn den-
tant betg mo interpresas re-
levantas per il sistem. Per
mai tutgan era las uniuns
en questa categoria. Sche
quellas «fan naufragi» na
collabescha il sistem betg,
ed er il donn economic è da
raschun supportabel. Quai
che collabescha è dentant –
almain per blers da nus – la
vita sociala e culturala.

Sco commember d'in'uniun
appreziesch jau ils
inscunters regulars cun col-
legas, cun persunas ch'jau
n'avess uschiglio probabla-
main mai emprendì a con-
nuscher. Sco commember
d'in'uniun appreziesch jau
il barat cun convischinas e
convischins ch'jau entaup
uschiglio strusch insacura.
E: Sco persuna che prenda
da nov dimora en ina vi-
schnanca na datti definiti-
vamain nagut meglier che
d'entrar en in'uniun per
emprender a conuscher las
atgnadads d'ina cuminan-
za.

Facit: Sche vus n'essas pia
anc betg commember u
commembra d'in'uniun è
uss arrivà il mument per
midar quai.

* Erwin Ardüser abitescha a Laax, la-
vura en l'administraziun dad RTR ed è
president dal Chor mischedau da
Laax e commember dal Chor viril Li-
gia Grischa.